

Istraživanje tržišta rada

Obavještavamo poslodavce sa sjedištem u Federaciji Bosne i Hercegovine da Federalni zavod za zapošljavanje, u saradnji sa službama za zapošljavanje, pokreće aktivnosti anketiranja poslodavaca u sklopu istraživanja tržišta rada u Federaciji BiH 2024/2025.

Istraživanje tržišta rada obavlja se u skladu sa Zakonom o posredovanju u zapošljavanju i socijalnoj sigurnosti nezaposlenih osoba („Službene novine Federacije BiH“, br. 41/01, 22/05 i 9/08), te Programom rada Federalnog zavoda za zapošljavanje. Anketiranje poslodavaca će provoditi predstavnici službi za zapošljavanje, u periodu od 28.10. do 31.12.2024. godine.

Federalni zavod za zapošljavanje i službe za zapošljavanje ovom prilikom pozivaju poslodavce da se odazovu anketarima iz službi za zapošljavanje i učestvuju u ovom istraživanju, kroz anonimnu anketu kojom je planirano da se obuhvati reprezentativni uzorak od oko 1.200 poslodavaca (malih, srednjih i velikih) iz Federacije BiH iz ključnih djelatnosti, a koji imaju pet i više zaposlenih.

Pitanja iz upitnika odnose se uglavnom na sagledavanje potreba poslodavaca za radnom snagom, pregled najtraženijih zanimanja i eventualnih viškova radne snage, otežavajuće okolnosti u pronalasku radnika, mogućnosti poslodavaca da organizuju obuku za nezaposlene osobe, kao i na zadovoljstvo uslugama javnih službi za zapošljavanje i dr.

Dobiveni rezultati će poslužiti za sagledavanje stanja na tržištu rada u 2024. i predviđanje kretanja na tržištu rada u 2025. godini, te unapređenje aktivnosti, projekata, usluga i saradnje javnih službi za zapošljavanje sa poslodavcima, kao i izradu javnih politika za tržište rada u Federaciji BiH zasnovanih na analizi postojećeg stanja i budućih trendova.

Istraživanje tržišta rada provode sve javne službe za zapošljavanje u Bosni i Hercegovini prema usklađenoj metodologiji i u istom periodu. Ovakav pristup omogućava dobijanje uporedivih podataka koji će se kasnije analizirati na nivou Bosne i Hercegovine, a u skladu sa najboljim praksama Evropske unije.

Rezultati i preporuke iz istraživanja će biti prezentirani javnosti početkom 2025. godine kroz odgovarajuće izvještaje.

Poziv za iskazivanje interesa za učešće na Sajmu poslova „Gledaj sebi posla“

Federalno ministarstvo rada i socijalne politike poziva sve poslovne subjekte sa sjedištem u Federaciji Bosne i Hercegovine da se prijave na najveći i najsveobuhvatniji **Sajam poslova „Gledaj sebi posla“** koji će se održati **10. i 11. decembra 2024. godine** u Hotelu „Hills“ u Sarajevu. Ovaj jedinstveni događaj će okupiti više od 100 poslodavaca/poslovnih subjekata i pružiti nezaposlenim osobama i onima koji traže promjenu u karijeri priliku da se prijave na 3000 slobodnih radnih mjesta.

Prednosti učešća na Sajmu poslova „Gledaj sebi posla“

Pored osiguranog štanda za direktno predstavljanje i promociju, imat ćete priliku:

- **ponuditi slobodne pozicije:** Predstavite svoje otvorene radne pozicije širokoj publici i privucite kvalificirane kandidate

- **objaviti radna mjesta preko web aplikacije „Gledaj sebi posla“:** Iskoristite aplikaciju kako biste jednostavno i besplatno objavili otvorene pozicije, omogućili kandidatima prijavljivanje i zakazali intervjue na Sajmu
- **upoznati se sa potencijalnim kandidatima:** Direktni kontakt sa kandidatima omogućava bolje upoznavanje njihovih kvalifikacija i kompetencija, što ubrzava selekcijski proces
- **susresti se sa velikim brojem studenata završnih godina fakulteta:** Sajam pruža idealnu priliku za poslovne subjekte koji traže mlade talente
- **dobiti plaćenu digitalnu kampanju sa ciljnom skupinom:** Učešćem na Sajmu, vaše otvorene radne pozicije će biti promovirane kroz plaćenu digitalnu kampanju koja će biti ciljano usmjerena prema relevantnim kandidatima
- **umrežiti se sa drugim poslodavcima i institucijama:** Sajam pruža mogućnost za povezivanje sa drugim učesnicima, razmjenu iskustava i uspostavljanje novih poslovnih saradnji
- **upoznati se sa mjerama aktivne politike zapošljavanja:** Saznajte više o zakonima, programima i mjerama koje su prilika i za nezaposlene i za poslodavce
- **upoznati se sa mogućnostima i pogodnostima koje pružaju Federalno ministarstvo rada i socijalne politike, Federalni zavod za zapošljavanje i Fond za profesionalnu rehabilitaciju i zapošljavanje osoba sa invaliditetom:** Poslovni subjekti će imati priliku direktno od predstavnika navedenih institucija dobiti informacije o načinu ostvarivanja prava na grantove, stručnu, finansijsku i druge vidove podrške
- **upoznati se sa zakonskom legislativom koja se odnosi na Zakon o radu, Zakon o zapošljavanju stranaca i Zakon o profesionalnoj rehabilitaciji i zapošljavanju osoba sa invaliditetom:** Sajam pruža nove mogućnosti za otklanjanje nedoumica koje mogu nastati primjenom određenih zakonskih procedura

Prednost za poslovne subjekte koji nude veći broj radnih mjesta i pozicija

Prednost će imati poslovni subjekti koje nude veći broj otvorenih radnih mjesta. Ovo će omogućiti da se na Sajmu promovira što više slobodnih radnih mjesta i poveća šansa za zapošljavanje što većeg broja osoba.

Prijave i dodatne informacije

Prijave za izlagače su otvorene do 1. decembra 2024. godine. Prijava i izbor poslovnih subjekata sa sjedištem u Federaciji BiH koji žele učestvovati odvijat će se kroz dvije faze:

1. iskazivanje interesa za učešće i informiranje o Sajmu poslova, uvjetima i sponzorskim paketima preko e-maila: sajamposlova@fmrsp.gov.ba ili telefonom +38762/324-132 ili +38733/568-827
2. registracija preko zvanične web stranice Sajma poslova i unošenje otvorenih radnih mjesta te popunjavanje pristupnice, prihvatanje uvjeta Sajma poslova i sponzorskih paketa.

Broj štandova je ograničen, stoga se prijavite što prije kako biste osigurali svoje učešće.

Program i aktivnosti Sajma poslova „Gledaj sebi posla“

Tokom Sajma, pored predstavljanja slobodnih radnih mjesta, bit će organizirano više edukacija, radionica i panel-diskusija na kojima će učestvovati eminentni stručnjaci iz oblasti zapošljavanja, radnih odnosa i ljudskih resursa. Posjetitelji će moći prisustvovati besplatnim edukacijama i razgovarati o mogućnostima zapošljavanja, umrežavanja i razvijanja karijere.

Web aplikacija za poslodavce i nezaposlene

Od 1. novembra bit će dostupna web aplikacija putem koje se poslovni subjekti i učesnici mogu prijaviti za učešće na Sajmu poslova. Također, aplikacija je namijenjena poslodavcima koji

potpuno besplatno mogu objaviti dostupna radna mjesta te nezaposlenima koji se mogu registrirati i prijaviti na otvorene pozicije. Ovaj dugoročni projekat povezat će poslovne subjekte koje su u potrebi za radnicima i osobe koje aktivno traže zaposlenje ili promjenu karijere.

Važno je biti dio promjene

Zajedno možemo doprinijeti kreiranju novih radnih mjesta i razvoju tržišta rada u Bosni i Hercegovini. Budite dio najvećeg Sajma poslova „Gledaj sebi posla“ i pokažite svoju spremnost da doprinesete pozitivnim promjenama na tržištu rada.